

Desvelo di Henny Eman Boulevard

Dia 6 di januari 2025, Aruba a despedi di Aruba su prome Minister President Sr. Henny Eman. Riba e mesun fecha, pero un aña despues, Gabinete AVP-Futuro, riba peticion di Stichting Henny Eman, a honra un visionario grandi den politica di Aruba nombrando un di e careteranan principal di Aruba na su nomber.

Parti di e caminda conoci pa decada como L.G. Smith Boulevard cu ta inicia na e rotonde di Mahuma te cu e rotonde di Sun Plaza, ta bira oficialmente Henny Eman Boulevard. E caya largo aki ta pasa dilanti di Aeropuerto Internacional Reina Beatrix, dilanti di Parlamento di Aruba y e oficina principal di Gobierno di Aruba y conecta cu e area di turistico principal cu tabata parti di e vision di Henny Eman.

Presidente di Stichting Henny Eman, Sr. Tico Croes a hiba palabra diamars atardi tambe durante e desvelo di e borch di Henny Eman Boulevard. Sr. Croes a comparti cu tur presente cu no por lubida con Henny Eman a enfrenta varios reto den nos turismo. "Henny a convence pueblo, pa den tres luna, pueblo haci un esfuerso di bay un banco; entrega e Flo-



rin Antiano y busca un florin Arubiano" Sr. Croes, cu tambe a fungi como minister den Gabinete Eman II y Eman III a cataloga esaki como un muestra con un lider ora e ta visionario, ora e por convece su comunidad cu e por cambia e motivacion individual pa motivacion y accion colectivo.

James Hepple, un experto den turismo na Aruba a repasa varios cifranan di nos turismo durante e ultimo decadanan "Lidernan manera Henny Eman no ta maneha djis economia, pero nan ta reimagina e intensidad di nos isla." Sr. Hepple a remarca pa nos sigui enfoca riba turismo y tuma tur accion necesario pa garantiza nos turismo sigui florece.

Minister-president mr. Mike Eman a comparti varios anecdota durante e bahada di

solo despues cu e devela e borch di Henny Eman Boulevard. "Awe si nos por disfruta di nos turismo ta Danki na Henny Eman su vision" Henny Eman como prome minister a declara 30% di Aruba como parke nacional, asina visionero Henny Eman tabata no solamente den e aspecto economico pero tambe den e identidad di kico ta mara nos n'e suelanan aki.

Fraccion di AVP den Parlamento di Aruba a participa diamars atardi na e ceremonia oficial di desvelo di e dedicacion di Henny Eman Boulevard, ubica na inicio di e caminda principal aki, cerca di e rotonde banda di aeropuerto. Tabata un honor grandi pa por ta testigo di e momento historico aki, unda un di e lidernan mas renombra di e partido a keda reconoci postumamente cu un distincion



di e caliber aki. E dedicacion di un caminda asina importante den infraestructura di Aruba ta un señal duradero di respet, gratitud y reconocimiento pa un persona cu a marca historia di nos pais, segun un comunicado di Fraccion AVP. E acto solemne tabata asisti pa un gran grupo di famia, colega politico, amigo, miembro distingui di sociedad, representante di prensa y dignatarios local.

Fraccion AVP ta kere cu ta di gran relevancia pa Aruba sigui reconoce nos gran estadistanan, y particularmente den e caso di Henny Eman. Como e prome Minister despues di Status Aparte, el a hiba un responsabilidad inmenso riba su schouder y a demostra liderato den un periodo dificil pa nos economia, specialmente despues di e cierre di refineria.

Banda di esaki, Henny Eman ta reconoci como un pionero den introduccion di e plan general di salud (AZV) y financiamiento di estudio den exterior (studielening), entre otro logro importante cu te dia di awe ta forma parti di e progreso di nos pais y e bienestar di nos ciudadanonan. Fraccion AVP ta destaca cu e legado di Henny Eman no ta limita na pasado, sino cu ta sigui bibo den e base di e sistema social y economico di Aruba, y den e balornan di servicio publico, vision y compromiso cu el a representa.

Na ocasion special aki, Fraccion AVP ta felicita y comparti e orguyo di e momento y ta reafirma nos compromiso pa honra e legado di nos lider historico door di sigui traha na beneficio di pueblo di A

President di Parlamento, Sr. Marlon Sneek (AVP):

Parlamento a sinta cu CMO pa confirma cu Aruba ta debidamente prepara

Ayera mainta, Parlamento di Aruba a tene un reunion cera cu director di Crisis Management Office (CMO), señor Rino Hermans, hunto cu otro miembronan di su delegacion. Durante e reunion aki, Parlamento a keda informa detayadamente tocante e situacion regional actual y e nivel di preparacion

di Aruba pa diferente eventualidad.

Diasabra di siman pasa, a consecuencia di e detencion di Nicolas Maduro na Venezuela, Parlamento a tuma e decision pa schorsnan reces di e dianan di fiesta y a yama inmediatamente un seniorenen convent.



Durante e encuentro ey, Prome Minister mr. Mike Eman y Minister di Husticia drs. Arthur Dowers a duna Parlamento un informacion amplio riba e situacion actual, e posibel desaroyo, y kico por ta e impacto pa Pais Aruba.

Manera ta conoci, e situacion te aworaki ta muestra señalnan di normalisacion. No obstante, Parlamento ta consciente cu den mesun contexto tin indicacionnan internacional, manera declaracionnan di presidente di Merca, Donald Trump, cu ta pone enfasis riba un

transicion pacifico, pero cu no ta exclui otro escenario si e proceso no sigui e rumbo desca. Esaki ta haci cu Parlamento ta wak e situacion cu seriedad y responsabilidad.

Pa Parlamento, ta di gran importancia pa ta bon informa riba e grado di preparacion di e departamentonan cu tin un rol clave den maneho di crisis, particularmente CMO, cu ta encarga di coordinacion den caso di situacionnan extraordinario. Durante e reunion ayera mainta, CMO a presenta nan plannan, procedimiento y e manera

cu tur entidad relevante ta trahando hunto pa garantiza estabilidad, seguridad y coordinacion.

E mensahe principal di e reunion tabata pa duna siguransa cu e institucionnan di Pais Aruba ta alerta, ta monitoreando e desaroyonan di cerca y leu, y ta prepara pa atende cu diferente escenario si esaki ta necesario. Parlamento, hunto cu Consejo di Minister y e instancianan competente, ta asumi plenamente nan responsabilidad institucional.

Parlamento di Aruba kier reafirma na pueblo cu tur medida necesario ta na su luga pa proteha e bienestar di nos comunidad. Den cualkier circunstancia, Parlamento lo keda na altura di su rol pa atende, supervisa y sostene e institucionnan cu ta sirbi nos pais.



Apreciabel clientenan,

Directie Voogdijraad pa motibonan imprevisto, ta haya nan mes obliga pa cancela nan servicio pa su clientela y pueblo di Aruba en general. E oficina lo ta cera te cu dia 12 di januari 2026.

Nos ta pidi disculpa pa e inconveniencia.